



Dingko Singh dak Covid-19 tashidak potet

Linuk ajunga June 21 tashi mokdanga ayutsu: Spain PM

VOL. XVII NO. 215 (ADOK 215) DIMAPUR

SANGTENNÜ (TUESDAY) AAMI (JUNE) 02, 2020

₹ 5.00

## Y. Kikheto Sema-i LFI Quarantine Centre semdang

**Kohima, June 1 (TYO):** Hombarnü Nagaland nung COVID-19 putetba osang mali aser iba ajanga tang tashi nung nisung 43 dak dang puteta lir.

"Taoba ghonda 24 tsüingda COVID-19 putetba osang mali" ta Health & Family Welfare, Minister, S Pangnyu Phom-i metetdaksü.

Nisung 43 prongji COVID-19 hospital tem nung anepaludar aser pamokji Dimapur nung 25, Kohima nung 13 aser Tuensang nung 5 lir. May 25, 2020 nü Nagaland nung

mezüing atema COVID-19 aketba putetba sülen anogoshia putetyonga aruba sülen tanü ang nisung shinga dak meputet süiogo.

Tanü nikongtsüsü 3:00 ako tashi nung COVID-19 sample 2,782 tashi bendena tendangogo, ta Health & Family Welfare Department-i metetdaksüogo.

Tang tashi puteta aliba nung sample 1656 negative aser 43 positive ta puteta lir. Maneni sample 1,083 indang osang ano mangu lir.

## Dimapur nung shishilembatsü mapang melenshir COVID-19 hospital talila ka nüngdaker

**Dimapur, June 1 (TYO):** June 1, 2020 nü District Task Force Dimapur senden ka amendang shishilembatsü asoshi mapang melenshitsu telemtetba agiogo.

Tang ya Dimapur nung anepdang 9:00 ako nungi nikongtsüsü 4:00 ako tashi dokantem lapoker saka DTF-i ibaji anepdang 9:00 ako nungi nikongtsüsü 2:00 ako tashi dang lapoktsü atema telemtetba agi.

Parnokisa tang atema malls, showrooms, restaurants (take away dena) ajak shibangtsü telemtetba agi aser hardware dokantem anepdang 6:00 nungi 10:00 ako tashi dang lapokdaksüsü.

DTF züingsem kari traffic maparen nung odd & even inyakyim takok ngua inyakba atema tenüngsang agütsü aser iba inyakyim ya nikongtsüsü 2:00 ako tashi maneni inyaktüsü telemtetba agi. Ajisiaka traffic tenokdangba nung ozüingi melaba garitembo senzüsü.

Nagaland nung COVID 19 puteter teimba ka Dimapur COVID Hospital nung anepaludar aser iba atema ventilators, monitors, regulators talila ayutsü nüngdaker. Anungji iba dak sendakba nung Dimapur DC-i temaba ketdangsertemi dangi shidi ka zülutsü atema DTF-isa telemtetba agiogo.

Rongdak nüngdak adokra Dimapur district nung COVID 19 Hospital tanga ka lapoktsü atema lenmang bushitsü aser iba atema tekaratiba nung sorkar dangi shidi zülutsü.

Taruba hopta tsüingda train aika arutsü lir aser tang Dimapur nungi sample tendangtsü atema Kohima o Dibrugarh-i yoker. Anungji Dimapur nung sample talila tendangtsü atema Truenat machine tem amenoktsüla, ta District Task Force-isa jembli.

"Taoba ghonda 24 tsüingda

## COVID Hospital Dimapur nem tenla agütsü

**Dimapur, June 1 (TYO):** Konyak Union Mon aser Konyak Baptist Church Dimapur-i COVID 19 Hospital Dimapur nem sen lakh kaka tenla agütsüogo.

Tanü Commissioner's Rest house Dimapur nung parnoki Medical Superintendent Dimapur, Dr. Kheshito Sema ket nung sen lakh 2ji agütsü.

Iba mapang APC Nagaland aser Dimapur district atema COVID-19 incharge, Kikheto Sema IAS aser Secretary F&CS aser Empowered Committee Convenor, Honje Konyak na liasü.

Konyak Union Mon tentung nung

Mosa Konyak-i o tatsüka jembidang COVID-19 anema tongti süa rararitem nem tenüngsang agütsü.

"Nenok achiajem shitak mesüi aser mejanga moi, taküm lendongi aitsüsa tensa ka nung mapa inyaker aser iba atema nenok dang pelar aser tenüngsang agütsü" ta pai ashi.

"Onoki nenok sarasadem ajanga nungiter aser Tsüngremi nenok atangji moatsüsü" ta Mosa Konyak-isa ashi.

Commissioner's Rest house nung sentong tatsüka agidang KBC Dimapur, Rev. M. Tonlong Konyak-i Lai züing sarasademba aser tajungshi o jembli

## Dimapur nung Aotsür Aortemi nisung 252 anepaludagi



(Abelen) Hobar nü Dimapur nung Aotsür Aortemi anepaluba Quarantine center nung anentsü purtem agizüka tenung züludaktsüba noksa nung angur. (Tachiji) Dimapur Naga Students' union-teni tebang nembangba mask lemtesüba noksa nung angur (June 01, 2020)

**Dimapur, June 01 (TYO) :** Covid 19 tashidak wara ajanga India tesem aika nung asen nübortem melitetsüsa akümer asünungji, anogo shia tesem balala nungi Naga nungertem Nagaland bushia arudagi aser tanü Hobar nü kija nunga India tesem balala nungi nisung 649 aruogo aser asünga nisung 291 arutsü.

Item rongnung Dimapur Area Ao Baptist Arogotem aser Dimapur nung aliba Aotsür Aor lokti tentet telongjemtem longjemer mesemtetba Quarantine center 3 nung nisung ajak agi 252 anendakja lir. Parnok ya Goa nungi aturtem teimba lir aser parnok rongnung tetsür 157 aser tebur 95 lir. Parnok ya mapa inyaker aser tazünger

lanurtem dang lir.

Tanep yakta parnok train nung Dimapur tonga aruba sülen Agri Expo nung government ketdangsertemi tenung zülüoka temang tendangba sülen Aotsür Aortemi mesemtetba tesemi anir arutsü. Iba quarantine center ya Dimapur govt college pur ki tululu asem nung lir. Idakji parnok anogo 14 nü amongtsü.

Tanü parnok amongtsüba tesem atongba sülen telok tenung nung Dimapur Ao Baptist Arogo nung sannüker Wb. Toshi Longkümeri parnok pelaa agizükba o shir sarasadem mapang agi aser chiyongdaksü.

Iba tesem nung amongertem pelashishia agizükba temaitsü

DABA Christian Education ministry ajanga renemtsüba yangku kaka agüja liasü. Iba yangku nungji anogo shia kaka azüingtsü atema Dimapur nung alir tanurtemi züluba shidi 14 enokja lir. Iba denji mask, chishichiratsü kar aser merükmejudang amshiba oset tilateri kar den Gideons International teloki menüingba Laishiba kaka enokja lir. Parnok among tepiyong Dimapur nung aliba Aotsür Aortemi parnok nem chiyongtsü agütsüsü. Parnok atema yipten den yipten süoshi aser tanga nüngdaktembo state government-i agüja lir.

Iba quarantine center nung anepdang aser aonung shia sannükertemi melentepa sarasadem mapang agitsü sentong adoka lir.

## Nisung 649 Dimapur tonga aru

**Dimapur, June 1 (TYO):** COVID-19 lockdown nung talenba kar salaba sülen tanü Kolkata nungi Dimapur tashi mezüingbuba passenger flight aruogo.

June 1, 2020 nü nisung 109 mener aruba tayimtsüji Dimapur Airport atong aser tamenertem rongnung Assam nungi nisung ana dena liasü.

Tanü airport nung APC aser Dimapur nung COVID-19 incharge, Kikheto Sema, Food & Civil Supplies Secretary, Honje Konyak,

Commissioner of Police Dimapur, Rothihu Tetso aser Chief Medical Officer, Dimapur, Dr. Tiasunep nungertemi parnok pelaa agizük.

Parnok arua atongba sülen Dimapur Christian Forum Chairman, Rev. Moses Murry-i sarasademtsü.

Airport nung teinyaktsütem inyakba sülen Kohima-i atutsüpur nisung 36 tashi bus ajanga yok aser tanüingba nisungtemji Agri Expo-i anir ao.

Külen, 'Empowered group'

Dimapur-i ashiba agi, June 1, 2020 nü tangalen nungi arur nisung 649 tashi Dimapur tongogo.

Tanü arurtem rongnung nisung 57 New Delhi nungi, Goa nungi 437, Jorhat nungi 4, Guwahati nungi 41 aser Kolkata nungi 110 lir, ta 'Empowered group' Dimapur-i metetdaksü.

Maneni, asüing (June 2) New Delhi, Dibrugarh, Guwahati aser Dehradun nungi nisung 291 tashi Nagaland tonga arutsü lir, ta parnokisa ashi.

## Nagaland maneni shibangtsü; Empowered Committee for COVID-19 tasen ka tentetshir

**Kohima, June 1 (TYO):** Linuk ajunga shibangba shilem pezübuba tatemlen kati arudang, Nagaland nung nisung aika dak COVID-19 putetba ajanga state sorkari lockdown magientsü telemtetba agiogo.

"May 4, 2020 nü Nagaland ajunga shibangtsü atema tetuyuba agüja aliba kecha magiener aser item ozüing maneni benshitsu" ta Hombarnü Nagaland Chief Secretary, Temjen Toy-i metetdaksüogo.

May 4 tetuyuba nung state sorkari March 25 nungi tenzüka lockdown atsülanger aser teinyaktsü kar reprangshimer May 17 tashi benshitsu ta shia lir.

Tanü Cabinet senden amenba

sülen Chief Minister Neiphiu Rio-i Secretariat Conference hall nung osangbener den jembidang "Onoki telemtetba tajung kar agiogo" ta ashi.

Tangalen nungi arurtem dak tendangdang negative ta puteta alir ajak pei pei district-i yoktsü aser iba nung North East kübok Green Zone nungi arurtem dendaktsüsü atema Cabinet-i telemtetba agiogo, ta Rio-i ashi.

Tang tashi nung nisung 4600 tashi tangalen nungi Nagaland-i arua lir aser parnok teimba ka Dimapur aser Kohima district kübok sorkar quarantine center balala nung mongdar, ta paisa shisem.

Maneni tarutsü anogotem

tangalen nungi nisung aika arutsü. Mongulbarnü Karnataka kübok Bengaluru nung Nagaland nungi nisung 1600 shi ka special train ka nung mener apusotsü aser parnok June 5 nü Dimapur atongtsü imlar.

Kohima nung quarantine asüba nisung ka swab testing result mangudang Tuensang-i yokba atema Chief Minister Rio-i ashiba agi, "iba tatalokba bushisüingdangtsü atema anogo 15 latettsüogo."

Tuensang ken o adokba sülen tanü Cabinet senden nung Empowered Committee for COVID-19 tasen ka tentetogo aser iba nung pa Chairperson aser Deputy Chief Minister Y Patton-i Deputy Chairperson inyaktüsü ta Rio-isa shisem.

# HSLC & HSSLC Exam 2020 dak sendakba nung NBSE-i metetdaksür

**Dimapur, Aami/June 01, 2020 (TYO):** High School Leaving Certificate (HSLC) aser Higher Secondary School Leaving Certificate (HSSLC) Examinations 2020 dak sendakba nung Nagaland Board of School Education (NBSE) ajanga teinyaktsü osang kar metetdaksüo.

NBSE sangdong ajanga ashiba agi, HSLC & HSSLC Examinations 2020 atema subject mashi indang answer-script tanaben meyipa repringhsitsü melatsü.

Answer-script tanaben repringhsitsü atema apply asüba candidate temi result adoker anogo 30 tsüingda (June 30, 2020 tashinung) nbsenag@gmail.com nung online ajanga apply asütsü. Iba atema subject shia senpak 500, SBI Account No. 39353961985, IFS Code SBIN0000214 nung inoktsüsüla. Sen inoktsüba scanned copy tem, marksheet, marksheet-cum-pass certificate, admit card aser phone/mobile number tem tekalen agüja aiba mail address dangi yoktsüla.

Result sangdonger anogo 40 tsüingda rescrutiny result ya sangdongtsü.

Rescrutiny result ya register süa aliba kaket reju ajak dangi yoktsü. Rescrutiny result ya nisung kija shia dangi meyoktsü.

Provisional result sangdongba nung melenshitsü aser inoksemsü/indoksemsü kar lira, rescrutiny result den külemi adoktsüsü. Rescrutiny result ya NBSE indang website

(www.nbsenagaland.com) nung agütsüsü.

Terms & condition tem nung aliba ama inyakba sülen answerscript indang photocopy candidate tem nem agütsüsü.

Iba maongka ya rescrutiny atema apply süa aliba candidate tem nem parnoki tanaben repringhsitsü agütsüba subject atema agütsüsü.

Rescrutiny atema apply masüba candidate temi answerscript photocopy magütsüsü.

Answerscript photocopy aginüba candidate temi online ajanga nbsenag@gmail.com dangi yoktsüla. Iba atema subject shia senpak 1000, SBI Account No. 39353961985, IFS Code SBIN0000214 nem agütsüsü. Candidate indang payment receipt, marksheet aser phone/mobile number ya agüja aliba mail address dangi application den külemi yoktsüla. Iba application ya rescrutiny result sangdonger anogo 15 tsüingda agütsüsüla.

HSLC (Compartmental) Examination 2020 atema maongka lapoka lir. Ajisüaka COVID-19 tashidak wara tensa ajanga tatidang agütsüyim tejangja khen lir sangdongtsü. Kaket reju tekolakpur aser nübur ajaki ibaji metetjema alitsüla.

K a k e t s h i r t e m i nbsenag@gmail.com ajanga online nung Migration Certificate atema apply sütettsü. Iba atema senpak 450 (postal charges densema) SBI Account No. 39353961985, IFS Code SBIN0000214 nung inoktsüsüla.

HSLC candidate tem atema payment receipt, admit card, marksheet-cum-pass certificate tem scanned copy tem aser HSSLC candidate tem atema marksheet & pass certificate tem yoktsüla.

Application nung kaketshir indang postal address tejangja agütsüsüla. Board-i e-mail ajanga Migration Certificate scan sür yoktsü aser hard copy ya post ajanga yoktsü.

Syllabus aser textbook melenshiba ajanga repeaters aser regular tem atema HSLC Examination 2021 nung Science Question Paper set ana agütsüsü. Science course tejenba agütsüsü asoshi repeater tem atema ibai maongka tatemangba asütsü.

Iba dak sendakba nung kaket reju tekolakpur aser Centre Superintendent temi pei centre nung repeater tem nem metetdaksüsüla.

Commerce Stream pur atema syllabus aser textbook tem melenba ajanga HSSLC Examination 2021 nung regular aser repeater candidate nem question paper set ana agütsüsü.

Subject tem yamai alitsü: (1) Business Studies (2) Accountancy aser (3) Entrepreneurship.

Repeater tem Old Course pur item subject nung tatidang agütsüsüshitsü asoshi ibai maongka tatemangba asütsü.

Iba dak sendakba nung kaket reju tekolakpur aser Centre Superintendent temi pei centre nung repeater tem nem metetdaksüsüla.

# Bhandari nung COVID-19 atema senden ka amen

**Dimapur, Aami/June 01, 2020 (TYO):** Bhandari Sub Division Block Task Force purtem COVID-19 dak sendakba nung ajungben senden ka ADC Conference Hall, Bhandari nung May 30, 2020 nü mena liasü. Iba senden nung inter-state arsttsü shibangtsüba aser dokan tem mapang tatakzük lapoktsüba indang jembi.

Security forces aser medical emergency service tem dak alaka Assam nungi aitba lenmang ajunga shibangtsü. Nüngdakba osettsüset ajungaDimaour ajanga mesüra Mokokchung district

ajanga bena atatsü, ta senden nung lemtet.

Bhandari nung dokan tem Hombarnü nungi Honibarnü tashi anepdang 7:00 ako nungi nikongdang 5:00 ako tashi lapoktsü. Dokan kibur aser nüburtemi social distancing aser temang müreka alitsüba agütsüo.

Nüburtem aser garitem nikongdang 6:00 ako nungi anepdang 6:00 ako tashi mesenzüdaksütsü. Iba totuyuba nung aibelener nem Epidemic Disease Act 1897 (IPC section

188) kübok merenshitsü, ta sangdong ajanga ashi.

Iba senden nung mendenpuba aser Additional Deputy Commissioner, Bhandari ajanga BTF züngsem aser NGO temi tajungtuba nung yaritepba asoshi pelaba lemsatet.

Iba senden nung BTF züngsemtem, 7th NAP commandant. SDPO Bhandari, MO (CHC) Bhandari, OC Bhandari, Company Commander 12th IR Merapani, kaketshir lenirtem, Lotha Hoho aser Eloe Hoho tir, Head Goanbura aser arogo lenirtem dena liasü.



Tuli jila nung aliba Twenty Street FC ajanga quarantine centre tem nung amshitsü asoshi district administration, Tuli nem tetsüng agi amshitetba teka shitokba oset tejang asem tenla agütsü, koba club züngsemtemi yanglua liasü. Item ya quarantine centre nung kangasa nüngdaka aliba oset liasü. Iba oset ya amshitsü temela aser lokti tentet balala, office, school, NGO aser kijaia club dang nungi iba oset ya alitsü akok. Iba oset dak sendakba nung tali tejangjaba metettsü asoshi club indang tir/secretary den mobile number 9612219854/7005900338 ajanga tongteprateptsü akok.



**पावरग्रिड  
POWERGRID**

**METETDAKTSÜR**

1. CERC (Conduct of Business) Regulations' 1999 nung regulation-86 aser CERC (terms and Conditions tariff) Regulations, 2014 kübok Regulations, 2019 atema (i) True up of Transmission tariff for 2014-19 tariff block and (ii) Determination of Transmission tariff for 2019-24 tariff block For Transmission assets under "North Eastern Region Strengthening Scheme-III (NERSS-III)" in North-Eastern Region.

2. Iba Transmission system ajanga tajangzük angütsü purtemji: (1) Assam State Electricity Board, (2) Meghalaya Energy Corporation Ltd. (3) Government of Arunachal Pradesh (4) Power & Electricity Deptt. Mizoram (5) Electricity Deptt., Manipur, (6) Deptt. of Power, Nagaland, (7) Tripura State Electricity Corporation Ltd.

3. Tariff details:

a) True up Transmission Tariff for 2014-19 Rs. In lakhs

Project	2014-15	2015 - 16	2016 -17	2017-18	2018-19	
Asset 1	AFC approved	0.00	0.00	0.00	126.74	274.40
	Revised AFC based on true up	0.00	0.00	0.00	121.52	256.60

b) Tariff for 2019-24 block Rs. In lakhs

Project	2019-20	2020-21	2021-22	2022-23	2023-24	
Asset-1	AFC	255.45	265.39	271.00	269.77	267.86

4. Tariff latettsü asoshi agütsüba application copy tagütsür indang website yangi enoktsüo: [www.powergridindia.com](http://www.powergridindia.com)

5. Iba Tariff latettsü agüja alina nung tebilemba mesüra magüzketba kar dang lira tajangzük angütsü purtemi mesüra nisung mashi kati Secretary, Central Electricity Regulatory Commission, 3rd & 4th floor, Chandralok Building, Janpath, New Delhi - 110001 (or other address where the office of the Commission is situated) dangi yoktsü aser kasa copyji ka iba applicant office address dangi iba osang adoker anogo 30 tsüingda yoktsüla.

Place: Gurgaon Sd/-  
Date : 27.05.2020 Chief General Manager (Commercial)

---

**POWER GRID CORPORATION OF INDIA LIMITED**  
(A Government of India Enterprise)  
Corp. Office : "Saudamin", Plot No. 2, Sector-29, Gurugram-122001, (Haryana) Tel. : 0124-2571700-719  
Reg. Office : B-9, Qutab Institutional Area, Katwaria Sarai, New Delhi-110 016. Tel. : 011-26560112, 26560121  
[www.powergridindia.com](http://www.powergridindia.com), CIN : L40101DL1989GOI038121

**A Maharatna PSU**

# Delimitation dak sendakba nung NPF, Mokokchung senden amen

**Dimapur, Aami/June 01, 2020 (TYO):** Linük tesem ajunga nung nütsüng yongsük dak ajemdaker assembly constituency aser parliamentary constituency-tem asetshitepa yanglushia aoba maparen, koba Indian Temzüng tetuyuba dak ajemdaker inyaka arur, kasaji Nagaland nunga Delimitation Act 2002 dak ajemdaker Delimitation Commission ka tenteta maparen

asir delimitation dak sendakba mapa kechisa Ao Senden ajanga tongpo apua inyakdar, item ajak nung NPF Mokokchung Division-i nungittsü aser kasaji sensosanger ajaki nungittsü ayongzük, ta jembi. Delimitation maparen nung Ao Senden ajanga tamalen nungi tongpu apua yakbangsür inyaka aruba ama tanüa kasa khuret agizüka inyaktsü aser tang asen lima aliba constituency-tem ya maneni wazüka ayutsü NPF-isa ayongzük.

Senden nungsa alima ajunga nung tebilemtsü khuret tulu bener aruja aliba COVID-19 tongpang nung taküm bendanga agüja inyaker yakbangpurtem aser lokti tentettem ajak den amalitepa inyaksangshitsü aser sorkar tetuyuba aser tazüokba ajak nung nüburtem ajaki tashi anga anidaktsü, NPF-isa ayongzüka, 'asenok ajak longjemer nokdakba ajanga corona virus tebilemtsü khuret ya koktettsü,' ta NPF Mokokchung Division, Media Cell ajanga sangdong ka nung teimla lemsatet.

Senden nungsa alima ajunga nung tebilemtsü khuret tulu bener aruja aliba COVID-19 tongpang nung taküm bendanga agüja inyaker yakbangpurtem aser lokti tentettem ajak den amalitepa inyaksangshitsü aser sorkar tetuyuba aser tazüokba ajak nung nüburtem ajaki tashi anga anidaktsü, NPF-isa ayongzüka, 'asenok ajak longjemer nokdakba ajanga corona virus tebilemtsü khuret ya koktettsü,' ta NPF Mokokchung Division, Media Cell ajanga sangdong ka nung teimla lemsatet.

# Wokha nung dokan tem 7:00-4:00 ako tsüingda lapoktsü

**Dimapur, Aami/June 01 (TYO):** Deputy Commissioner & Chairman District Task Force for COVID-19, Wokha, Orenthung Lotha-i sangdong ka ajanga ashiba agi, Ministry of Home Affairs ajanga teinyaktsü metetdaksüba ama shibanga aliba lemsar lapoktsü asoshi, Wokha jila nung shishilempaba tesem aser dokan tem June 1, 2020 nü nungi tenzüka Hombarnü nungi Honibarnü tashi anepdang 7:00 ako nungi nikongdang 4:00 ako tashi lapoktsü.

ama maneni shibanga alitsü. Dokan kibur aser nüburtemi social distancing aser mürekmejuba yimya kanga junga amshitsüla.

Ajisüaka hotels, restaurants, salons aser beauty parlor tem taoba mapang metetdaksüba

Maneni nija garitem atema Odd aser Even policy ya June 1, 2020 nü nungi tenzüka amshitsü. District Administration, Police aser Medical department, medical emergencies aser sorkar ketdangser duty nung senzür dak alaka nüburtem aser garitemjajaba Deobarnü dena mapa inyakba anogo ajak nung nikongdang 6:00 ako nungi anepdang 6:00 ako tashi nokdangtsü, ta kasa sangdong ajanga ashi.

# Maj Gen Bakshi-i ADG mapa nungi sodi angu

**Guwahati, June 01** (Agencies): Honibarnü Maj Gen Bipin Bakshi-i NCC Directorate, Northeast Region nung Additional Director General mapa nungi sodi nguogo. Küm 38 tashi tenzüka aruba sülen Maj Gen Bakshi kümsük agi tonger mapa nungi anisüngzüko. Maj Gen Bakshi mapa inyaksü atema tatembang anogo nung pai Shillong nung aliba War Memorial nung sepaitem nem tetushi agütsü.

NCC Northeast Region nung ADG ama inyakdang pai mezüngbuba Brahmaputra Sailing Expedition ayongzüka agi aser iba ya 2019 küm Limca Book of Records nunga zülüokogo, ta Defence PRO, Lt Col P. Khongsai-i ashi. "1948 küm NCC tentetba sülen NCC Directorate kati linük nung otsüsütsü süa inyakba mapaji iba ya mezüng liasü" ta Khongsai-isa ashi. "NCC Northeast contingent-isa Republic Day 2020 NCC

Competition nung mezüng atema takok angu. Linük nung NCC Directorates 17 tetoktepba nung iba takok ya Maj Gen Bakshi lenisüba kübok anguba liasü" ta paisa metetdaksü. Shillong nung NER Directorate-isa NCC cadet tem mapa nungo 100% jungnüa inyaksü maongka agütsüogo. Yashi Maj Gen Bakshi-i Brig RK Singh ket nung Additional Director General (ADG) mapa amoktsü.

# Sonowal-i ASDMA ketdangsertem ayongzüük

**Guwahati, June 01** (Agencies): Deobarnü Assam Chief Minister Sarbananda Sonowal-i Assam State Disaster Management Authority (ASDMA) indang State Emergency Operations Centre (SEOC) semdanga liasü. Sonowal-isa pa indang office conference hall nung ASDMA senden ka ayonga amen aser idangji ASDMA ketdangsertem dang technology amshia alima lendongtsüdong

indang osangtsüsang jelia metetdaksütsü ayongzüük. "ASDMA maparen ya yimtsüng nungi tenzüker state jenjang tashi jungjunga inyaksüla. Ketdangsertemi tzümetsüng, tsüngi aser iba mesükba lendong indang osangtem jelia sangdongtsüla" ta Chief Minister-isa ashi. Sonowal-isa ASDMA dang All India Radio aser Door Darshan ajanga osang belenshitsü tetuyuba agütsü. (Maneni tapak 9 nung...)



## Dear Farmers... India Stands By You

### To mitigate the losses owing to the Corona pandemic

- Rs. 2 lakh crore have been allocated to provide additional concessional credit through Kisan Credit Card.
- Rs. 6000 is being given in three equal installments of Rs. 2000 each under PM-KISAN.
- 9.72 crore farmer families have been given Rs. 19,457 crore during the lockdown period.

### Strengthening Farm-gate infrastructure, to increase farmers' income

- A scheme worth **Rs. 1 lakh crore** launched to strengthen cold storage chain and supply chain.

### Creating better pricing structure for farmers

- In addition to the APMCs, several agriculture market reforms carried out to provide better market options. Farmers can now sell their crops anywhere and avail better prices.
- Amendments announced in Essential Commodities Act, APMC Act, Mandi Act to offer better price to Farmers.
- A scheme worth Rs. 10,000 crore is dedicated to over 2 lakh unorganized Micro Food Processing Enterprises. This will help in them establishing their own brand.

### Standing by Fishermen

- A provision of Rs. 20,050 crore financial assistance has been made under PM Matsya Sampada Yojana to give an unprecedented boost to marine and inland fisheries.

### For the Animal Husbandry Farmers

- A total of Rs. 15,000 crore have been allocated to revive the animal husbandry sector.

**War Against Corona - Nation's Victory lies in your victory**



“ The crisis the world is facing today teaches us that way forward is - Aatmanirbhar Bharat (A self-reliant India) ”  
- Narendra Modi, Prime Minister



For more information, visit - [transformingindia.mygov.in/aatmanirbharbharat](https://transformingindia.mygov.in/aatmanirbharbharat)

dayp22112/13/0005/2021



## TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 02, 2020

### Tamanger telongjem

**A**lima nung tamangba yimsü koba südirsiaka amangba purtem longjemer pei pei amangba Tsüngremi mulungba mapa inyaksü asoshi amanger. Tetezü, koba tamangba yimsü südir siaka pei kija amanger ayutsüba masü saka pa mesüra la ajanga tangartema amangdaksütsüla. Iba jagi Khristan-tem dangbo Yisui " nenok nisung apur kümdaksütsü " ta ashiba asenoki meteta lir. Ibayongji, Yisu dak amanger Khristan-tem asoshibo mapa teinyaksü tulutibaji tangar dang meimtsü aser Yisu temeim memetet aser mangatet alirtem dang alima meimchir menen asoshi Yisui pei taküm bendanga agütsüba osangtajung indang shia temulung meyipdaksütsübaji ozüngsa inyaksüba mapa ka lir. Aji oda, kodang tamangertem renloka odir lokti telongjem ka tentetter aser ibaji arogo lir. Iba arogo nung züngsempurtem ajungaji, joko, kibong ka chir akümer, kechiyong parnok ajakji Tsüngrem chirtem, anungji parnok akaba ajak arok meyong akümer. Asenoki tenyartertem mapang arogo tenzükdang tamangertemi yamaji pei akaba ajak bener arua külem meyong rongsen asütsü asoshi ketdangpurtem nem agütsüba otsü azünger. Atangji, asenokibo asenok akaba ajakbo magütsütetter saka Tsüngremi asenok nem moatsüba nungi arogo nem ter shilem, tepela, tenüngsang aser mission tenla agütsür. Item tenlatemji amangba purtemi arogo ajanga Tsüngrem nem agütsüba tenlatem lir. Tsüngremi asenok yariba aser moatsüba mapatem ya nisung kar ajanga dang arutsü, aser yamaji asenoki Tsüngrem nem agütsüba tenlatema nisung ajanga dangsa agütsütsü, kechiyong asenoki Tsüngrem mangu aser Pa den tejak o tejak ajurutepa jembitsübaji asenok shi agibo metizüktetsü. Aji oda, kodang tamangertem longjemer sarasadem rongsen bendener, Tsüngrem tashiji yangji lir. Iba jagi Yisui kija ta masü saka kong nisung ana mesüra asem longjema lir yangji ni dena lir ta ashi südi. Ibaji amangba purtem, arogo nunger longjema aliba indang ashir. Aji oda, kodang asenok amangba purtem ana danga mesüra asem danga mesüra mapang mapang shia tamangertem ajak ajurua Tsüngrem tenüng sanga ajungshitepdir, idangji Tsüngremi mulungba mapa tajung inyaksü asoshi asenok tasü aser tashi aiter. Tsüngremi aginübaji aji lir. Ajisüaka, tanü meimlaika, alima nung asenokibo meteta matalokdangba tashidak wara tamajung agi asenok sentepa melitetsüsa kümogo. Ano tesasatsükaji, sentep melitetba dang masü saka asenok kinunger adianu aser kidang-kiyonger aser medemertema majurutepettsüsa nokdanga lir. Iba tensa mapang ya, talisa, Khristan-tem daksa mapetba anogo mapang ka lir. Atangji, iba ama mapang nung tamangertem kibong aika nung kibong tekülem agia Tsüngrem o bushi tenzüksü aser aika sarasadem nung akangshitsü. Ano, iba ama mapang nung arogoi arok meyong rongsen amshia nüngdakba purtem yaritsü aser kija kibong asoshia temeim mapa inyaksü mapang tajung asütsü. Ajisüaka, jungjunga bilemdangra, asenok amangba purtem, arogo nunger külemi longjema ken ka tena sarasadem mapang magii arogo ka takümüji talangka moutettsü. Asenok tamanger tajung kaka asütsüa akok saka tenla ki lapoka Tsüngrem o tangatetba aser tajungshiba taküm mapang mapang shia sannüker tajungi magütsüra, asenok aika tamang nung azülaa adoktsü. Ibayongji, taoba hopta nung iba osangkaket nung " Arogo nunger tenla kidang lokti sentep sentong ya agi nunga koma süla ? " ta asüba nung bilemdangogo. Iba telangzüba agütsürtem aikati tashidak nokdangtetsü atema lokti sentep ya tangbo maliang tajungba asütsü ta shisalemsatepogo. Aji shitak, alima nung ali tashibo mapa metenra tamang tasü asütsü, anungji lokti adenshidak tashidak menatepa aoer süra sentepa malitsübaji mapa agi merangba asütsü. Ajisüaka, yamaisa mapang talangka sentep melii ora, arogo nunger telongjem raksatsü, anungji longjemer Tsüngremer mapa tulu inyakba to meinyaktetsüsa akümstsü. Iba bilemba jagi lokti tulusa mesüaka, tenla ki lapoka mapang aser kibongtem lemsar, akhidang temoatsü sentep ken dang agi aliba to tanübo anaben-asebenka agi nunga jungdi sü ta bilemer.

## OLEMSABANG

### KECHIBA CORONA VIRUS YA TALISA NAGA NUNGER ASOSHI TETSÜBUTSÜ?

- Mr. Aliba Imchen, LIFE CONCERN MINISTRIES

Ni lanuwa mapang nung anguba asen nuburi pei alu nung inyaktetba aonsotsü, sungjanglijang ayoktsü aaka (shy) liasü. Peisasa inyaktetba nung peria chir külen tanüngbatemji sen kümdaksütsü tekoloki maidaksütet liasü.

Ano Idangji tajung inyakyonga tiluja, sentepi meranga aoyonga menuja, kanga kümdanga aliyonga tekoro, ochi jembiyonga tali tesashi, sensaker kibong nungi arena tanür tajung adokyonga tiluja sensaker chiri kechi sutettsü ta shia shitakren inyakyim aser tsüngrem temeim mangatet liasü.

Item mopungtem nung asenok intetogo. Saka Tsüngremer taochi aser tsürabur asameyang ajanga asenok nuchi ngudakja lir iba ma nung asenok tali saksalemshir aramesotsü iba wara tolu ajanga saksalemstsü mapang tajung lir.

Iba amala situation nung tamang ilatsü masü, saka tasa tasen aser meinyaki zütoka aliba (loopholes) mapatem bushia inyaksü mapang tajung ta angateta itemji inyaksü tenzüksüla.

Tsüngremi kü nem shisatsü tajung aser metsübuttsü tanüla agüja, Tang lock down mapang nung, ni mapa ishika inyakba rongnung yangi kar lemsar, mapang tensa den apet teimla aser tesunep ken social media face book ajanga ni mezüng 25th march nung yok aser total lock down 6th april nu frontliners atema Dimapur town telungtet nung police points, sarasadem nungdaka aliba nuburtem bushia oa sarasadema senzü, Radio station ajanga Ao ken aser English kentem tena teimla aser saksalemshiba kentem yok, ni inyakbatem ashibaji asenoki meinyaktet alibatem ajak ken shisadanga bushia inyaksü lemsarbadang.

Ni atema lockdown ya tajunga liasü, tamajunga kar tenji saka ni Tsüngrem dang pelar. Hau! alima shi agibo kibong toktsür ita aseembuba saka terenemshiba mapang aser bilemdangba mapang ta ni agizük. Tamangertem asoshi tang ya mapa jak nung asentenshitsu mapang tajung ta agizükdaktsüner.

Mapang ka nung lanur lenir tajung yimtsüng ka nungi adok pai inyakbaji lanur asoshi kanga dang tajung liasü, saka tia maka timtemer kibong nungi paji liasü. Anungji, pai meranga tajung inyaktetakasa pa degree tulu maliba den külemi timtemer kibong nungi asüba agi pa idakji meinyaktsüsa tia aru.

Tanü Tsüngrem aser tensa/mapangi asenok nungi akhangbaji ne degree-ji dang masü saka ne tangatetba, Tsüngrem asoshi aser tarutsü jenjang tajung asoshi ochi aser meranga inyakbaji akhanger.

Taküm ka liyonga aotsü tazüngba degree kanga dang nungdaker, saka nai degree den koma medemer, degree tajung agizüka yur ibaji mamshi nungbo masü degree aser tangatetba jagi inyakdaksür aser inyakteter aser iba jagi lanurtem angazükdaksür. Tanü putu nung aseni tajung inyakba jagi lanurtem ajangzükdar ta angatetsüla.

Aseni tang ajuruba tensa tamajung ajanga Yisu marui lira lanurtem nem lesson tajung yutsütsüba mapang ka asütsü nungdaker, tajung dang tajung shia tamajung dang tamajung ta shiteta ochi mapa tajung inyaksü tenzüksüba mapang ta angatedakja yutsütsü mapang lir.

Kija kibongitemia iba amala tensa tamajung ka nung kechi rezünga lir aser inyakteta lir, amanger takartembo rongsenbo peria yua kar sudi, saka tangar state dak meimlai achitsü tsük aser kanga tenungdak chiyongtsübo meinyaktet sudi.

India lima nung BREAD BASKET OF INDIA ta ajaba state ji Chandigarh state lir, par state i aluyimba mapa aika inyakteter aser talisa jang (rice) lir, Aser par perir külen india lima ajak nung supply asür, tanü tensa tamajung ka nung pari inyakteta mali asübo koma sula? Na rongsenbo akatsü akok, saka na aya dang kong nungi alir chiyongtsü?

Aser iba corona virus ajanga parnokia aluyima mapa meinyaktetnungbo chiyongtsü kong nungi angutsü?

Tang mapang ya government, arogo, kija kibong, societies etc. ajak asentenshi mapang ka suner. Yisu alimai marudang tajung dang tamajung ta jar aliba mopungisa onshidaktsü nungbo majungtsü.

Corona virus tetsübuttsü ya asen naga nunger aser meranga meinyaker aser government tamajung nung lishirtem asoshi tetsübuttsü tuluba lir.

Tawa Marwari nungba ji corona virus positive suspect putetdaksübaji Tsüngremer tashi aser taochi naga nunger asoshi, iba jagi government i kecha meiyaki aliba iba tatalokba agi dang inyaka tenzüksü, aser nuburtema tali tekümdangshiba nung tenzüksü talisa iba ajanga corona virus test lab lapoktet.

Anungji asenoki Tsüngrem tenung tali sangdi aser Marwari nungba atemaa sarademtsüdima.

Aseni manguba Tsüngrem külemer pai asenok kanga meimer aser kümzüker. Eg. Aki otsü ka nung lung külema aru tsükchir den raratepdang külema aliba lung (stone) anasa nungi ter talang ka jagi lungi aonbaji mi (fire) adokasa aonba agi tsükchiri makok ta otsü ashir, iba mesukba nung aseni amangba Tsüngremji mangur saka pa ochi aser temeim akaba Tsüngrem asü nung pa dak dang jenokdi, (2puti 7:13-14) tsüngrem tashi ajanga meimchir nem shisatsü agütsür mozütem (medicine) yangludaktsü aser mozü nung Tsüngrem tendakja iba ajanga Tsüngremi tanebtsü agütsütsü aser kümzüksü.

Anungji Yisui marui lira iba corona virus war sullenbo, Tsüngremer wadang tem talangi dang masü saka pei san indaksüba nung mission, aluyimtsü mapa ajanga mission, Tsüngrem külemba mapa ajanga mission, carpentry sayuba mapa ajanga mission, education tajung ngudaksütsü mapa ajanga mission, Yimden yimsusuba mapa nung mission, government mapa nung mission, timtemer ka chiyongtsü peria ngudakja aser Yisu kadaksütsü mapa nung mission, Peisasa peria litetsü mapa nung mission (self reliant) Tangar state dak meyimlai chiyongtsü peria angutsü mapa nung mission etc... (Holistic missions) Tang ya asenoki lesson agir mapa ajak nung asentenshi magira lendng tolu lir.

Iba articles nung madoksaba/ aibelen kar lira melenshia agidaktsüner. Tsüngremi asen Naga lima moajang.

Temetetsü: Yakta SYCAMORE TREE HOLISTIC missions kaket ka Sayatsü, email alibaimchen@rediffmail.com, contact, 9738292619

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



March 1, 2020 nü Abuja nung Khristantemi Nigeria nung yimjung alitsü atema yimdong süa sarasadema jajaba noksa nung angur. Nigeria nung Catholic Khristantemi Boko Haram teloki Khristantem tepsetba aser sen akhangtsü atema nisung apuba tatalokbatem aitsü.

## Christian Asso. of Nigeria-i putir Joseph Masin chiokang ta akhanger

**June 01, 2020:** Christian Association of Nigeria (CAN)-i Nigeria sorkar dang Nasarawa State unit nung CAN chairman, Bishop Joseph Masin chioktsü atema inyangang, ta takhangba agütsü.

Putir, Joseph ya taoba hopta par kidang lia puer ao.

Bodhbar aonung Lafia state kübok Bukan Masin nung mejangjaba nisung kar motorcycles nung aru aser putir, Masin par kidang lia puer ao. Pa puer aortem jagi pa chioktsü atema Nigeria nunger sen Naira million 20 (US sen 52,000) akhanger, ta Christain Association of Nigeria media & communications department nung tongti, Pastor Adebayo Oladeji-i metetdaksü.

Pastor, Adebayo-i, "Onok meyong police mali aser onoki

akok tashi mepetmesü madoktsüsa inyaker. Onoki Federal sorkar aser Nasarawa State sorkar dang tekaraba nung putir, Masin kecha meyirui chioktsü atema inyangang ta akhanger," ta metetdaksü.

Taküm January ita nunga Boko Haram kiralongrar teloki CAN Michika Local Government Area, Adamawa State Chairman, Rev. Lawan Andimi puer oa liasü.

Pa puer aoba sülen anogo ishika lir video ka nung pai Arogo aser sorkar lenirtem dang pa chioktsü atema inyangdaksüner ta mepishi. Ajisüaka kiralongrartemi akhangba ama Khristantemi senotsü peria mengutetba ajanga pa tepsetogo, ta bilemer. Open Doors USA's 2020

World Watch List nung Khristantem tamajungba reshikangshiba linüktem rongnung Nigeria linük jentang 12buba nung lir.

U.S. State Department-iat ang mezüng Nigeria linük ya religious freedom maliba "special watch list" linüktem rongnung züngokogo.

Tamalen CAN-i sangdong ka ajanga, "Nisung puer aoba, sen akhangba aser Khristantem densema tai maket Nigeria nunger jenti tepsetba ya sorkar atema taaktsüka lir, kechiyong sorkari telungpur tebilemstü parnok koktetogo ta jembir," ta metetdakja liasü.

"Sorkari parnoki telungpurtem koktetogo ta jembiba shia kiralongrartemi nisung timba-timba tepseter," ta CAN-i metetdaksü.

## ANOGO ABEN TSÜNGREM DEN

### TANÜ TATALOKBAJI ASÜNG ASOSHI

#### TEKÜMDANGTSÜ

*Prof. Rev. Rongsen, Mokokchung.*

Asen Naga lima nung Covid-19 tashidak mali asüba asen sensotemi bendanglen nungi menar aru. Parnok aika aruogo aser ano aikasa arutsü anendaka lir.

Tawa Chinnai nungi arurtem Kohima tonger tashidak ali\_mali tendanger ano kechi adok aji memetet dang nisung kar Tuensangi yokba yangji tashidakji lir ta putet ta osang angashia kanga aoksa bilem. Ibai achaayangertem parnok mapa nung tejung majet aser nemzünemkoba mapa amai lir.

Iba mapa ya shibai/shirnoki koda aser kechiba inyak aji jungjunga bushitetsüla. Saka senchi chia temerenshi agutsütsü asoshi, masü saka tarutsü asoshi tansutsü aser tekümdangtsü asütsü asoshi inyaktsüla.

Kechiyong kechi atalokogo aji atalokogo. Aji oda aibelenerji atetaponga menrenshiba agi kechi atalokogo aji matalok mekümdaktsütetsü. Aji oda tashidak ka atema mozü ka achi nung ano tanga tashidak ka adokdaksü ama iba tatalokba ya mekümdaktsütsü ajaki merangtsüla.

Iba ama tatalokba ya ajanga kin o kin na aser telok o telok na yongtsü melangmepu aser mangatetep adoktsü ana nung lir. Iba ama maparenji ajanga asen Naga nunger Aunpu nungi kneta mimong nung tsük ama asütsü mesura Supu aadang Surem shisa ama asütsü.

Anungji tang surbo ajaknadi kanga shisa kaa mapa ajak nendaknendak oda terpen bilemdanger ang inyaktsüla. Kechi mapasa sudir ka o ka na shisa lemsatepa aser angatetepa inyaktsüla.

Alima otsü nung Neapolion ken yimbazü nung Waterloo nung tongtibang tongbang jirepba asenoki angazüka lir. Ibai asenok asoshi tansutsü tangazüksü tulu tatalokba ka lir.

Iba ama Covid 19 tashidak tongpang tulu raradang, wajak nung yakbangsa inyaker rongnung kari tera yimbazü nung aser kari tanga ka bilema mapa kar meshidaki inyak nung iba tashidak agi asen lima asüngtsü. Tanga lima nung ama iba tashidak asen lima nung adok nungbo asen Naga nungerbo ajak amai remoka asütsü. Kechiyong asen lima maparen aika nung pi memenep. Tashidak putetsü oset peria maka, shirangertem yaritsü mozü ki peria maka, tashidak den raratsü osetsüset lijaliogtsü senotsüa peria maka. Anungji asenoki inyaktsütsüba mapa tajungtiba aser temeladibaji iba tashidak ya asen lima nung menatepa aser prokshia modaktsütsü merangtsüla.

Aji asinung Naga senso ajaki pei kin, pei tesem, pei telok aser pei kibong kija asoshi masü saka Naga nunger rangpen asoshi bilema pei-i inyaktsütsüba mapatem Tsüngrem dang nungi shisa meshia inyaktsü merangtepdi ta ayonzüker.

## White House anasa longkak aiter temi St. John Tenla kidang mi senoktsü

**Washington D.C, Aami/ June 01 (Agencies):** Amongnü aonung (May 31) longkak aiter temi Washington D.C anasa St. John's Episcopal Church indang parish rongdoktsüba den külemi Tenla ki raksatsü aser mi senoktsü.

Fox News nungi osangbener kati, "Longkak aiter temi White House anasa aliba St. John Tenla ki rongdoktsüdar. Iba ya tejashitsü ka lir. Iba tenla ki ya tepor kanga junger. St. John Tenla ki ya lenla aika nung mitsa ka mesüka lir, aser iba Tenla ki rongdokba ngua jashir. Iba mi remseptsü imlar," ta metetdaksü.

Osang angazükba agi, US Tirtem aikati tanela leniba bushia iba Tenla ki bushiasa ogo aser linük putiotsü nung iba Tenla kidang mi senoktsübaji takoksa tulu lir.

"Tirtem aika iba Tenla kidangi oa menogo. Linük

tensa mapang tamajung mapang nung parnoki Amongnü tekülem sentong nung adentsü atema iba Tenla kidang jagi ogo. Küm aika Tirtem aser parnok kibongtem Lafayette Park adena oa St. John Tenla kidang menogo," ta kasa osang ajanga metetdaksü.

May 31 ayaterm nung Metropolitan Police Department-i twitter ajanga nüburttem dang, "Police aser Washington DC Fire Department-i St. John's Episcopal Church densema yimti nung mi lendong tatalokba aika anema inyangdar. 1800's tetenzüklen nungi iba Tenla ki ya asen yimti nung nokdaka liasü. Iba tesem azüngtettsütsü mepishir," ta metetdakja liasü.

Amongnü aonung longkak aiter temi iba Tenla ki kima aliba US nunger wako-a ka shisaja liasü.

St. John Arogoi parnok

indang website ajanga, iba Tenla kidang "US Tirtem Tenla ki" ta ajar, kechiyong James Madison nungi tenzük Tir ajaki St. John Tenla kidangi oa tekülem sentongtem nung denogo; menden 54 bubaji Tirtem atema lir, ta metetdaksü.

Iba Tenla ki ya 1816 küm December 27 nü meshiteta semzükä liasü aser iba Arogo ya National Historic Landmark ta züngoka lir.

Amongnü Arogo züngsemtem dang Rev. Rob Fisher-i, tang linük nung mepetmesü adoka aliba aser Hokolbar aonunga iba Tenla ki raksatsüba indang osang metetdakja liasü.

Rev. Fisher-i, "Onoki teimla nung nenok dangi iba shidi zülur. Asen nüburttem aser linük nüburttem tejashi nung lir. Nisung meyirjang aikati ola adoker aser George Floyd ama tangar aika metepsettsü atema tesünep

nung longkak aiter. Tanep putir, Curry-i metetdaksüba ama taruba anogotem aser hoptatem nung asenoki Arogo ka ama longjemmer temeim lenmang nung jajatsü," ta metetdaksü.

Tawa United States kübok Minneapolis nung police-i tashiyim amshiba ajanga tanak nisung, George Floyd tepsetba sülen US kübok yimti 140 nung iba tatalokba anema longkak aitar. Tesem aika nung longkak aiter temi kiojen raksatsüba den kiojen rongdoktsüba ajanga state 21 nungbo National Guard sepaitem lemzükja lir.

George Floyd tepsetba tatalokba anema Honibar tashi nung anogo Floyd ya tesüba küm aika pongunübuba longkak aitba mapang nung police aser National Guard sepaitemi longkak aiter temi nokdangtsü merandang mepetmesü tulu adoka liasü.

Aonung 8:00 ako nungi

curfew özüng benokba sülen nungi Minneapolis nung police-i longkak aiter temi apu tenzük aser longkak aiter temi dak tear gas khaloktsü.

May 25, 2020 nü Minneapolis nung aliba dokan

kima ka nung police-i arrshi küm 46, George Floyd apu. Video noksa nung police officer ka tenüng agi, Derek Chauvin-i temekok agi Floyd tekong nung tsüketer minute aikai timtemdaksü. Floyd-i pa tangu junga mesashiteter, ta aiben ashi saka Chauvin-i maneni temekok agi pa tekong nung tsüketbaji mechiok.

Arrshi küm 44, Chauvin-i Floyd tepset, ta pa nem tai tonglokja ken o benokogo.

Floyd ya tesüba küm aika Minneapolis nung telidak liasü, iba yimti nung pa club ka nung 'bouncer' inyaka liasü ajsüaka coronavirus tashidak prokba nokdangtsü atema linük shibangba ajanga

pa mapa makai aküm.

**OLONG PAITEP # 5476**

	1		2			3		4		5
6								7		
					8		9			
			10							
11										
				12						
13		14		15						16
17								18		

<b>TIPILEN</b>		<b>LANGTSÜNGLEN</b>	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Repranzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashiochtsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

**OLONG PAITEP # 5475 ELANGZÜBA**

<b>TIPILEN :</b>		<b>LANGTSÜNGLEN :</b>	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiochtsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	



**Alokbai Lockdown mapang Gate & Town nung duty nokdakertem ajongshir**

**Alokba** : Ohoi...Police-tem, tang Lockdown mapang nenok nubur mechi belemseta duty nokdakba ya kanga meima repranger... Saka nenoka temelenshitsü kar lir adii... Nenok karbo Mask maki ser nisung aika anasatepa nokdaker...Surabang COVID-19 tashitakji Police-tembo memenatsü asu koda...??? Aser tang ya tashitak wara tesashi den tongpang rarar dang ashi...Sorkar o nübur tsüngda rara adokba, mesüra nübur tsüngda lendong kar atalokba masu... Anungji kari tashi mangai aibelenyongjia...Akokba tashi timyim agi angatetdakja azüoktsü merangtsüla...Saka tashiyim agi teka sangshia züka memerenshitsüla.

Ohoii... Village/Ward/Colony nung yimsüsürtem/Gaon Bura-tem/Volenteers-tem...Nenok-a nubur mechi timtema yim süngküm nung duty nokdakba ya kangasa meima repranger... Ajisüaka, ano nenok temelenshitsü kar lir adii...Nenokbo shinga 'Mask' makir, aser nisung aika anasatepa mena kazür.... Sürabangla sorka-i temzüng-ozüng agütsübaji nenokibo mebenshir ado...Nisung ajak Mask agitsüla...nisung o nisung na tsüngda metre kabo tetsüngda ayutsüla. Sürabang Coronavirus tashitak ya nenok yimsüsür & volunteer-tembo memenatsü asu koda...??? Mesüra nenokibo tangar dakmemenaloktsütsü asu koda ??? Temzüng-ozüngji ajak atema-a ta angatetsüla.

~ Lilir : L. Kika Pongener.

**TANÜBO NAI LANGZÜANG**

Q. BRICS indang Heads of Tax Authorities senden nung India tenüng nungi shibai shilem agia liasü?

A. Ajay Bhushan Pandey  
B. Nirmala Sitharaman  
C. Krishnamurthy Subramanian  
D. Subhash Chandra Garg

(Taruba adok nung onoki langzüsü)

**YASHI ADOK TELANGZÜBA :1966**

**NAI-A YA METETTER MA?**

**INDIA NUNG SEN TIMTIBA AAZÜKER TONGTIBANG NISUNG KAR:**

1. Mukesh Ambani	Net worth: \$51.4 billion
2. Gautam Adani	Net worth: \$15.7 billion
3. Hinduja brothers	Net worth: \$15.6 billion
4. Pallonji Mistry	Net worth: \$15 billion
5. Uday Kotak	Net worth: \$14.8 billion
6. Shiv Nadar	Net worth: \$14.4 billion
7. Radhakishan Damani	Net worth: \$14.3 billion
8. Godrej family	Net worth: \$12 billion
9. Lakshmi Mittal	Net worth: \$10.5 billion
10. Kumar Birla	Net worth: \$9.6 billion
11. Bajaj family	Net worth: \$9.2 billion
12. Cyrus Poonawalla	Net worth: \$9.1 billion
13. Burman family	Net worth: \$8.3 billion
14. Sunil Mittal	Net worth: \$7.6 billion
15. Dilip Shanghvi	Net worth: \$7.55 billion

**SUDOKU # 5518      TELANGZUBA # 5517**

					6	7			1	5	3	7	6	9	2	8	4	
1	2				8			4	5	8	4	7	2	5	3	9	6	1
4	7				3				9	2	9	6	8	4	1	7	5	3
7	8	9	1	2	3					5	3	2	1	7	6	8	4	9
3		2			6	5	1	9	7	4	1	9	3	8	2	6	7	5
			1		9	4	8	3	2	6	7	8	5	9	4	3	1	2
5							9	7		9	8	1	4	2	7	5	3	6
	1	7				8	4			3	6	5	9	1	8	4	2	7
		8			7		3			7	2	4	6	3	5	1	9	8

**OJANG LUTEP # 5066**

NAESSAAMR	: <input type="text"/>
TEAAM	: <input type="text"/>
ANNDBGOBEA	: <input type="text"/>
SAER	: <input type="text"/>
TSHAMAIR	: <input type="text"/>
NGDOONGR	: <input type="text"/>
SHISAO	: <input type="text"/>
ÜKBTAAZ	: <input type="text"/>
EMAENR	: <input type="text"/>
IRL	: <input type="text"/>

**OJANG LUTEP TELANGZÜBA # 5065**

METSÜ MAPANG AZÜMESENERI ALU MALATSÜ  
ALURUWA ARUDANG PA KECHA MAKATSÜ

**TAN HOPTA ATEMA - KOMA SÜLA ?**

Q.Tang ya Nagaland nung assembly election agi nunga koma süla ?

## Covid agi tamajungba kongshiba linüktem rongnung India 7buba kümogo

**New Delhi, Aami/June 01 (Agencies):** India nung tesüiba ghonda 24 tsüingda ano nisung 8,392 dak coronavirus tashidak putetogo aser kasa mapang nungjisa iba tashidak agi nisung 230 süogo.

Linük nung coronavirus tashidak agi asür ajak agi 5,394 jungogo aser nisung ajak agi 1,90,535 dak iba tashidak putetogo, ta Hombarnü Union Health Ministry-i metetdaksü.

Alima nung coronavirus tashidak agi tamajungba kongshiba linük 10 rongnung India jenjang 7buba kümogo.

Tang linük nung iba tashidak agi teshirangdakpur 93,322 lir aser nisung 91,818 bo anepadokogo; anungji iba tashidak agi shirangertem anepba shilemji 48.19 shi lir, ta health ministry nungi tongti ketdangser kati metetdaksü.

Amongnü anepdang nungi Hombarnü anepdang 8:00 ako

tashi nung iba tashidak agi asür nisung 230 rongnung Maharashtra nung asür 89, Delhi nung 57, Gujarat nung 31, Tamil Nadu nung 13, Uttar Pradesh nung 12, West Bengal nung ti, Madhya Pradesh nung tenet, Telangana nung pongu, Karnataka nung asem, Andhra Pradesh nung ana aser Bihar, Punjab aser Rajasthan states shia nungi nisung kaka asüba densema lir.

## Hyderabad nung BJP lenir ka dak Covid-19 putet



BJP MLA ka dak coronavirus tashidak putetogo; pa dak iba tashidak putetba sülen health ketdangsertemi par kibong züngsem- kinüngtsü, jabaso, jabaso kinüngtsü nung ajak dak iba tashidak tendang aser parnok ajak dak iba tashidak putet.

Tang parnok ajak nija hospital ka nung treatment agidar.

Taoba mapang MLA aser Telangana nung BJP lenir tain,

Ramachandra Reddy-i tawa linük nung ainlen mesenzü mesüra bendang linüktemia mao, mesüra pai coronavirus tashidak aketer ajurua mali, ajisüaka pa lokti nung alidang iba tashidak mena asütsüa akok, ta bilemer.

Tawa sensakertem nem chiyungtsü lema agütsüba sentong nunga pa dena liasü aser May 24 nü tesüsabuba lokti sentong ka nung dena liasü, ta osang angazüker.

**Hyderabad, June 01 (Agencies):** Hombarnü Hyderabad nung taoba mapang

## Ano state asem nung One Nation One Ration Card scheme tenzükogo

**Nagaland nunga Aug. 1 tashi nung iba scheme tenzüksüa akok**

**New Delhi, June 01 (Agencies):** Ato kilonser, Narendra Modi-i tenzükba 'One Nation One Ration Card' scheme state 20 nung mapa küma inyakdar aser sangküm March 31 tashi nungbo iba scheme ya state ajak nung tenzükter alitsü atema sorkar nükjijong lir.

Hombarnü Union Consumer Affairs, Food & Public Distribution Minister, Ram Vilas Paswan-i, Odisha, Sikkim aser Mizoram state tem 'One Nation One Ration Card' scheme nung denogo aser ibaji densemabo tang tashi nung state ajak agi 20 IMPDS

(Integrated Management of Public Distribution System) den sendaktepogo, ta metetdaksü.

Union Minister-i twitter ajanga, "Ni tamalen metetdaksüba ama, ano state asem- Odisha, Sikkim aser Mizoram-a tantü sorkar indang

'One Nation One Ration Card' scheme nung denogo. Iba ya densemabo state 20-i IMPDS scheme nung denogo," ta metetdaksü.

Ano tanga tweet ka ajanga Paswan-i, "2021 küm March 21 tashi nungbo 'One Nation One Ration Card' Scheme ya linük tesem ajak nung mapa küma inyaktsü. Iba dak sendakba nung August 1, 2020 tashi nung Uttarakhand, Nagaland aser Manipur nunga tenzüksü atema maparen inyakdar," ta metetdaksü.

March 31, 2021 tashi nung linük tesem ajaklen iba scheme mapa küma inyakba sülenbo National Food Security Act (NFSA) kübok Public Distribution System (PDS) beneficiary kati linük tesem mashie nung ration angutsü.

Tang NFSA kübok nisung crore 81 nem jenjang dalang agi jang agütsür.

# CHRISTIAN HIGHER SECONDARY SCHOOL




**IN LOVE AND TRUTH WE STRIVE**

NYAMO LOTH ROAD, DIMAPUR - 797112, NAGALAND

*Congratulations*

thanks be to God! He gives us the victory through our Lord Jesus Christ. ~ I Corinthians 15:57


## HSSLC TOPPERS 2020



**ICCHA UPADHYAY**  
COMMERCE - 1<sup>st</sup> Rank



**SWEETI DEY**  
COMMERCE - 3<sup>rd</sup> Rank



**ALLOMI ACHUMI**  
ARTS- 5<sup>th</sup> Rank

## SUBJECT TOPPERS 2020

### ICCHA UPADHYAY

ACCOUNTANCY	100
BUSINESS STUDIES	98
ECONOMICS	97
FBM	99
IP	100

### SWEETY DEY

HINDI	93
-------	----

Sd/-  
**S. MOATEMSU WALLING**  
Principal

# George Floyd asüba mechi US nung longkak aitba manener

**Washington, Aami/June 01 (Agencies):** United States nung kin anema tashiyim amshiba aser police temi tim masüba mapa inyakba anema rongrong tulu adoka aliba azüoktsü merangba mapang White House anasa mi jangru, New York City aser Southern California nung dokan tem nung rakzükraktem aser Minneapolis nung longkak aita yimtung nung jajaritem alidaki tanker truck ka anir ao.



Rongrong tenzükter Deobarnü agi anogo trokbuba lir aser item tensa azüoktsü asoshi state 15 aser Washington, D.C. nung National Guard sepaitem yok. Police ket nung sentsü tanak nisung, George Floyd asüba mechi yimjung nung longkak ait tenzüka tensa tamajungba aküm.

"Ni aliba yimti nung yamai angutsü sempar, saka tatem nung asenoki ochi obendang nüngdaker," ta arishi küm 18 tain Jahvon Craven-i aonung 8:00 ako atongtsü lia Minneapolis jila nungi longkak aiter repranga ashi.

May 25 nü Minneapolis police officer temesüing nisung kati arishi küm 46 tain Floyd dak tekong nung temokok agi ali nung nenketer minute teku jungnüa ayuba sülen pa asü.

Pa asüba ajanga tir election agitsüba mapang yimtenren aser kin balala tsüngda telemsa adoker aliba linük tesem ajungalen nüburtem ain adok, kong coronavirus tashidak wara mechi kidang alitsü totuyuba agüja aliba tawa ang lapok.

United States kübok yimti

aika nung ketdangsertemi curfew benok, koba 1968 küm Martin Luther King Jr tepsetba sülen yimti timtiba nung curfew benokba alitsü.

Tir Donald Trump-i tang longkak aiteritem ya mapa tamajung inyakertemi ta ashir.

"Democrat Mayor aser Governor tem temolung ulushiang. Item nisung ya ANARCHIST tem lir. TANG National Guard jaokang," ta Trump-i Deobar nikongdang Twitter nung zülutsü.

Saka Trump administration ajanga tangbo National Guard maziüoktsü, ta national security adviser Robert O'Brien-i ashi.

Washington, D.C. nung Deobarnü longkak aiteritemi White House anasa mi apo. Iba mi mokozi yagi tear gas khaloktsüba nembang aser

police temi nüburtem dang iba tesem nungi ainshitsü ashi, kong longkak aiteritemi "George Floyd" ta ayimtena liasü.

Boston nunga tesem kar nung rongrong adok, kong yimjung nung longkak aitba sülen police dak bottle agi aon aser police gari ka nung mi senloktsü. Philadelphia nung aonung 6:00 ako nungi anepdang 6:00 ako (par mapang) tashi curfew alitsü sangdongogo.

Deobar nikongtsütsü Minneapolis nung aliba I-35 highway nung longkak aiter alidaki tanker truck ka anir ao, kong gari mesenzütsü shibanger liasü. Longkak aiteritemi gari anisang ya gari nungi atsüteter azük aser police temi pua bener ao. Saka iba gari yagi longkak aiter dak tsükshiba mangu.

West Coast tsütsü Portland, Oregon nung rongrong adok, kong longkak aiteritemi mi apo aser police temi tear gas khaloktsü.

Santa Monica, California nung aliba nüngtugu Third Street Promenade tesem nung aliba dokan tem nung rakzükraktem asü aser iba mapang police tem arua nisung kar apu.

South tsütsü Los Angeles kübok Long Beach nung lanur telok kati shopping mall indang window tem raksatsü aser yangji aliba osettsüset auya, saka nikongdang 6:00 ako curfew mapang senshidaktsü.

Longkak aitba nung kin balala nungi shilem agir.

"Sentsü tanak nisungtem dak alaka dangartemia longkak aitba nung shilem agiba ya

kanga pelar," ta Culver City, California nung jajar sentsü tanak tetsür, Candace Collins-i ashi.

Deobar nikongdang sepaitemi state capitol ki lungbangba mapang Minneapolis anasa aliba St. Paul nung rally ka atema nisung meyerijang aika adenshi. Iba yimti nung store 170 shi nung auyaogo, ta iba yimti indang mayor-i ashi.

Alima tesem ajungalen longkak aiter, koba London aser Berlin nung Deobarnü longkak ait aser Hombarnü New Zealand, Australia aser Netherlands linüktem nung longkak aita liasü.

Taoba mapang Minneapolis nung police mapa inyaka alisang arishi küm 44 tain Derek Chauvin ya Hokulbarnü puaka rongrong manener. Pa anema nisung tepsetba ken o benoka lir.

New York City, kong store indang kijiba raksatsü, yangji police temi nisung 350 shi apu aser rongrong nung police 30 shi tera yiru. Brooklyn nung longkak aiteritemi police indang kari nung jana-ona mereploksü aser police gari ka longkak aiter anasa senzüba video ka anguba sülen iba inyakyim bushisüngdang süogo, ta Mayor Bill de Blasio-i ashi.

Chicago, Seattle, Salt Lake City, Cleveland aser Dallas nunga longkak ait, kong ki-o-jen raksatsürtemi dokan kibur ka dak züka merenshiba video nung nguogo, shibai nok tuluka amer longkak longkak aiteritem arishia liasü.

## Linük ajunga June 21 tashi mokdanga ayutsü: Spain PM



Pedro Sanchez

**Barcelona, Aami/June 1 (Agencies):** Spain Ato Kiloner-i Deobarnü ashiba agi, "wara teti atema samadaktsütsü asoshi," linük ajunga June 21 nü tashi anogo 15 ano mokdanga ayutsü nüngdaka lir, aser iba atema Parliament dang temelaba meshitsü.

"Onoki inyaktsü atemtetba timba tembanga inyakogo," ta Pedro Sanchez-i osangbener den sensaksemba mapang ashi. Paisa, Spain nung COVID-19 tashidak menar tajemba küma aoba atema anisüngzükba lemsatepogo, kechiyong iba tashidak agi kanga mejungi kongshiba linük tem rongnung Spain-a

densema lir.

June 21 nü sülen emergency sangdonga aliba tembangtsü aser linük mokdanga aliba lapoktsü; iba ajanga lisopurtem pei tesem nung sadem sadema senzütsü asoshi temelaba agütsütsü.

July 1 nü nungi tenzüka lisopurtem linük ajunga nung senzütettsü.

Deobarnü tashi nung Spain nung nisung 27,127 süogo, ta health ministry-i ashiba den COVID-19 tashidak menar nisung 239,429 ajungba metetdaktsüogo.

Spain nung March 14 nü emergency benok, kong linük ajunga ajang ajanga mokdanga ayutsüba densema liasü aser nüburtem chiyongtsü alitsü, temang anepalutsü asoshi mozüki semdangtsü mesera kidang nungi minyaktetertem pei mapai aotsü dang temelaba agüja liasü. Iba tetuyuba kübok tanurtem anogo tepeyong pei kidang nungi kechaia meyoki liasü, saka iba talenba ya tanem tanemi salaa odar.

Tawa linük mokdanga ayutsü asoshi telemtetba agiba

atema party aikati anema nokdak aser Spain kübok tesem balala nung longkak aita liasü, ajisüaka Sanchez-i Catalan separatist party Esquerra Republicana de Catalunya (ERC) den tenanzüktepeba ka yanglua, iba inyakyim maneni benoka atatsü asoshi parnoki nüngdakba teyari ngua liasü.

Tang linük ajunga mokdang aliba ya June 7 nü tembangtsü.

Sanchez-isa, linük ajunga tatembangsa mokdanga ayuba mapang, tashidak kanga junga azüoktetba tesemtem nem health care azüoktsü asoshi bendanga agütsütsü, ta ashi.

Tashidak kanga bulua menatapa maoba tesemtem apir sorkari talenba salatsüyonga arudar aser iba tashidak tanaben poktetra ibaji azüoktsü asoshi tajungba renema lir. Inyakyim balala tenzükshiba mapang tang tinyaktsü tongtipangtibaji tashidak azüoka ayutsü asoshi lir. Sanchez-i ashiba agi, taküm economy shilem 9 agi tejemba akümstü aser ibaji menoktsü asoshi küm ana agitsü.

## Afghan osangbener tepsetba atema IS temi tenüing agi

**Kabul, Aami/June 1, 2020 (Agencies):** Kabul nung aliba television station ka nung inyaker mena aliba minibus ka nung Honibarnü bomb pokdaktsüba atema Islamic State (IS) temi tenüing agiogo, kong osangbener ka aser technician ka asü.

Nikongdang nisung nungtepeba mapang atalokba lendong nungya nisung tenet yirua liasü. Noksatem nung minibus ka tejaklen kanga mejungi raksar liasü.

"Onok külemi inyaker Mir Wahed Shah, economic reporter aser Shafiq Amiri, technical department nung inyaker iba lendong nung tepset," ta Khurshid TV station nung chief executive, Mohammad Rafi Rafiq Sediqi-i ashi.

United States, European Union aser NATO ajanga iba lendong aitsü. Taoba küm iba ama lendong ka atalokba nung Khurshid TV nung inyaker ana tepset aser ana yiruja liasü.

Islamic State, kobai sorkar meyong sepai aser Taliban telungpur den rarar, parnoki Afghanistan jila tem nung

lendong agütsüba tenüing agia arur. Saka parnoki Honibarnü lendong indang kuli kecha magütsü.

Taliban aser danga Islamist telungpur temi Afghan nung osangbener dak aiben lendong agüja arur aser 2018 küm osangbener nisung 15 tepset, koba Afghanistan nung osangbener asoshi tamajungtiba küm liasü, ta Reporters Without Borders ajanga ashi.

2016 küm Taliban telok nungi taküm bendanga agütsür bomb pokloktsür kati Tolo TV nung inyaker mena aliba bus ka nung oa tsüka osangbener nisung tenet taküm samatsü.

US-i aniba sepaitemi 2001 küm yimsüsüba nungi atsüngdokba telok, Taliban ajanga ashiba agi, Tolo TV yagi US mitkar aser Western linüktemi busemba Afghanistan sorkar indang olulu adoktsür.

Taoba küm August ita Khurshid TV indang gari ka nung 'sticky bomb' ka menaloker pokdaktsüba lendong nung süyisübonger ana asü aser iba TV channel nung inyaker asem yiru.



## Tuensang DTF senden menogo

**Tuensang, Aami/June 01, 2020 (TYO):** Hombarnü, Longleng DC conference hall nung Tuensang District Task Force for COVID 19-i senden ka ayongzüka agiogo. Iba senden nung Tuensang Deputy Commissioner, Kumar Ramnikant mendenti liasü.

Iba senden agiba mapang, Tuensang kübok 'Green Zone' Quarantine Center tem nungi batch tanabuba odaktsütsü/pei pei kidangi yokadoktsü asoshi telok jembitep.

Item quarantine centre nungi nisung 36 - Abigail Hostel Longkhim nungi tetsür 6 aser tebur 3; aser Setam Polytechnic Quarantine facility nungi tebur 16 aser tetsür 11 quarantine nung anogo 14 tembanga mungogo aser parnok ya June 1, 2020 nü pei pei kidangi yoktsü asoshi teloki lemtet.

Batch tanabuba nung nisung 36 ya pei pei yimtsüng aser ward temi aoba mapang, timtem majurudaktsütsü asoshi medical kulikaket aser tetuyba tejangja densema parnok ya odaktsütsü aser iba sülen parnok ajak pei pei kidang anogo tenet talila quarantine asütsü. Iba maparen atema, parnok kija shia Medical team-i anepalutsü.

Kasa senden nung, Tuensang district kübok BSL 2 laboratory amenoktsü aser yanglutsü atema aruba engineer tem indang osang nung telok olemtepa liasü. Iba den külemi, red zone tesemtem nungi arurtem tanaben tendangtsü asoshi jembishinüogo.

## Mon DC-i metetdaktsür

**Mon, June 01, 2020 (TYO):** Jakphang aser Ukha yimtsüng ana tsüngda Longching nungi kilometer 24 shi pila orr aliba Mokha Nulla Bridge ya ali anenoka aiba ajanga apu shilem kar raksaogo, ta sangdong ka ajanga nübur dang Mon Deputy Commissioner Thavaseelan K, IAS-i metetdaktsür.

Anungji, nübur ajak kümzüka alitsü asoshi, iba apu junga meyanglu tashi, iba sangdongba anogo nungi tenzüka garitem iba apu ajanga senzütsü asoshi nokdang, ta DC-isa metetdaktsü.

## Sonowal-i ASDMA...

(Tapak 3 nungi...)

"ASDMA ketdangsertemi gaonburha tem den video conference agitsüla aser tzümetsüng mesüra tanga lendongtsüdong indang osang tejangja bendentsüla. ASDMA-isa gaonburha tem den telephone ajanga osang agiteptsüla aser iba nung ni-a shilem agitsü" ta Sonowal-isa ashi.

Tzüngluruwa mapang rong nung amenertem lendong nungi kümzüksü atema life jackets asemtsüla aser life jackets peria agütsütsüla, ta paisa metetdaktsü.

ASDMA-i flood relief camps nung tanurtem asoshia tesem renemtsüba atema tenüngsang agütsür aser iba ajanga COVID-19 atema nisung o nisung tepila ayuba tajungba inyaktetsü imlar, ta Sonowal-isa ashi.

## OFFICE OF THE DIMAPUR YAONGYIMSEN LONGKUM SAYIR ELANGTSUR TELONGJEM

DIMAPUR - NAGALAND.

### TENÜNGSANG AGÜTSÜR



Wb. Akok Longkümer aser Wt. Moasenla Imsong na jala **Kongru Wangshirenla Longkümer**-i taküm 2020 küm Class 12 Science Stream tatidang nung takok angur ajak dang tematiba takok jenjang Top 5(a) nung takok ngutetba asoshi la nem tenüngsang tulu agütsür. Ano, 2018 kuma laisa Class 10 tatidang nung takok jenjang Top 8 nung takok tulu ngua liasü. Iba amai yimtsür yimer aser kidong ajak nümadangtetsüsa takok korang ngutetba asoshi la nem Dimapur aser

Yaongyimsen yimtak alir Longküm Sayir Elangtsürtem ajaki konang tetushi tulu agütsür.

Lai aika rongnungi takok nung mera tasen ka tongtetbaji ajanga Tsüngremi tarutsü nunga tajungtiba jenjang nung takok ngudakjangma ta onoki sarasademtsür.

Sd/-  
Wt. ATULA LKR.  
President.

Sd/-  
Wt. MAYANGLA LKR  
Gen. Secretary.

## OFFICE OF THE DIMAPUR MOAYIMTI SENSO TELONGJEM

DIMAPUR - 797112: NAGALAND.

### TENÜNGSANG AGÜTSÜR



Wb. S. Walu Tzüdir aser Wt. Asangla na jala **Kongru Sangerbenla Tzüdir**-i Holy Cross Higher Secondary School nungi HSSLC Science stream tatidang nung tematiba takok angurtem rongnung Topper 4 buba takok jenjang ngutetba yimtsür yimer nem takok konang bener arutsüba asoshi Dimapur Moayimti Senso Telongjemi la aser lar tsürabur ajak nem tenüngsang tetushi agütsür aser ano maneni Tsüngremi la wadang nung takok ngudakjang ta

sarasademtsür.

Iba den yimtsür yimer shirnokisa taküm HSLC aser HSSLC 2020 tatidang nung takok nguogo, nenok ajak nem tenüngsang tulu agütsür. Tsüngremi ano maneni nenok tarutsü anogotem nunga takok ngua aniangma ta sarasadema atar.

Sd/-  
T. BENDANG WALLING  
Tir, DMST.

Sd/-  
Y. MEREN LEMTUR  
Tongti Zulur, DMST.

## OFFICE OF THE CHANGTONGYA STUDENTS UNION KOHIMA

### Tenüngsang Agütsür



Ms. Imlibenla,  
Mr & Mrs. L. Bendangtemjen  
HSSLC (Arts) top 5



Ms. Odikala  
Mr & Mrs. Sowa Jamir  
HSLC top 13

nati 2020 küm NBSE ajanga agiba tatidang nung takok tajung ngutetba asoshi CSUK-i tenüngsang aser tetushi agütsür. Maneni nenok azüngba wadang nung takok tajung angutsü sarasademtsür.

Iba den külemi shirnoksa HSLC & HSSLC tatidang nung takok nguogo, nenok ajak nem tenüngsang tulu agütsür.

Sd/-  
Pursanen  
Tir

Sd/-  
Lipokinla  
Tongti Zulur

## Office Of The MANGMETONG STUDENTS' UNION

DIMAPUR : UNIT

Motto: "For the Nation"

### TENÜNGSANG AGÜTSÜR

Wb. Dr. Wapang Imchen aser Wt. Dr. Anungla na jala, Kr. Temjenienla I Imchen-i HSLC Exam 2020 nung Top 13 jenjang ngutetba asoshi Mangmetong Students' Union Dimapur-i tenüngsang aser tetushi agütsür. Tsüngremi la taküm aser wadang ano maneni moajang ta ozü sarasadem.

Maneni taküm NBSE kübok HSLC aser HSSLC tatidang nung Mangmetong kaketsür kwikati jenjang balala nung takok nguogo, nenok jak dang Union-i pelaba lemsateper.

Sd/-  
(IMNATEMSU PONGEN)  
President, MSUD

Sd/-  
(TSUKTILONG JAMIR)  
General Secretary, MSUD

## Mulungnen O

Onoki teti meima aliba Ojala **Lt. Purnungla**, W/o. Lt. Tsuktitemjen (Mongsenyimti) 30/05/2020 anogo nung ajungbena asüba mapang shirnokisa nübo, rongsen aser sarasadem agi onok den yaritepogo, nenok ajak dang kanga pelar.

Onoki tsüngdong arua nenok dang pelaba mesayutetaka tajungsang Tsüngremi nenok maneni moajangma.

~ Temeim Chirnurtem, Semchirtem,  
Anükapangtem aser Kinungertem.



## SÜR KÜM KA ABENSAR

Küm ka süidema oaka na onok mulung nung teti menungrar.

Oba ne sayu o aser mapa tajung teti onoki bilemteter.

Temeim Kinungtsü,  
Chirnur, Anükapang  
& Semchir.



## SÜR KÜM 50 AJUNGER

Tesayur Manglalepden (1894 - 1970)



Nai onok yutsür kodanga tatem makaba Kotak lima nung Tebu den alitsü asoshi orr küm 50 süyigo. Nü ochi aser tongmelang taküm yimya agi onok tali ajungmeso aser onoki itemji maneni senti ama züngshir aser onok taküm nung amshir.

~ Chirnurtem aser Semchirtem.

## Office of the LONGSA SENSO TETSÜR TELONGJEM

HQ. LONGSA

MOKOKCHUNG - 798601: NAGALAND

### KONANG TETUSHI AGATSÜR



Sp. Imtisünep Jamir  
HSLC Top 12



Kr. Imlimenla N Longkumer  
HSSLC Top 9 Arts Stream

Longsa Senso rongnungi tetemjen kaketsür Sp. Imtisünep Jamir S/o Wb. Lanuwati Longsa aser Wt. Moamenla, HSLC (2019-2020) Top. 12 aser Kr. Imlimenla N Longkumer D/o Nokmarenba Longsa aser Kr. Temeitula, HSSLC (2019-2020) Top. 9 (Arts Stream) pei kaketsür wadang nung takok jenjang tulu ngua Longsa Senso nübur nem tenüngsang bener arutsüba tepela Longsa Senso Tetsür Telongjem (LSTT) Sabang ajanga Tsüngrem tenüng sanga takok angur nem tenüngsang agatsür aser iba tepela ajak den lemsateper.

Iba den külemi Longsa Lanur HSLC aser HSSLC kaketsür shirnokisa tatidang ajangtetogo LSTT sabang ajanga ajak nem tenüngsang agatsür. Tsüngremi tarutsü nenok wadang nung maneni moajangma ta sarasademtsür.

Sd/-  
Wt. Tiakala  
President (LSTT)

Sd/-  
Wt. Toshiyangla  
Secretary (LSTT)

# Khel Ratna atema Panghal & Vikas na tenüng agütsü

**New Delhi, Aami/June 1 (Agencies):** Boxing Federation of India-i Hombarnü Rajiv Gandhi Khel Ratna award atema World silver-medallist Amit Panghal aser asayar tejen Vikas Krishan na tenüng agütsüo.

BFI-i Arjuna awards atema Lovlina Borgohain (69kg), Simranjit Kaur (64kg) aser Manish Kaushik (63kg) nunger tenüng agüjatokogo. Parnok asem rongnung Borgohain-i world bronze medal anaben tashi kokteta lir.

Dronacharya awards atema BFI-i national women's coach Mohammed Ali Qamar aser assistant coach Chhote Lal Yadav na tenüng agütsüsi telemtetba agiogo.

"Asayar aser coach tem ya küm pezü tsüngda parnok asaya aser inyakyim asadanger tenüng agütsüo," ta BFI-i ashi.

Arishi küm 24 tain Panghal (52kg), shiba Asian Games champion lir, pai national sports award ka danga nguteta mali. Pa taoba küm asem tashi Arjuna award atema tenüng agütsüo saka 2012 küm tenokdangba mozü amshiba dak sendakba nung ken o adoker aliba ajanga selection committee-i pa meshimi arudar.

"Pa linük tenüng nungi tokteptsü asoshi melar aser pai medal akokba atemabo tenüngsang agütsür. Pa nem iba naroküm agütsüsi langa lir," ta BFI Executive Director

RK Sacheti-i ashi. Taoba küm BFI-i pa meshim tashi pa tenüng benoktsü asoshi azüngashia ayu. Youth category nung asayaba mapang chicken pox agi shirangba anepalutsü asoshi mozü amshiba dak sendakba nung Panghal-i aibelena liasü.

"Ni asaa inyakba masü. Ni kü nem agütsüba mozü dang achi aser tarutsü atema kecha memeteti liasü. Ni iba naroküm atema asadangtsü ta imlaa atar," ta Panghal-i PTI dang ashi.

Paisa, Sports Minister Kiren Rijiju dang naroküm asoshi shimshiba yimya melenshitsü khangogo. Pai self-nomination inyakyim aser committee kati takoker shimba yimya melenshitsü mepeshia asüngdangogo.

Pai ashiba agi, tang inyakyim ya tim masü aser ministry-i takoker shimtsüla, kechiyong asayartemi takok angubattem ajaki jangjaa dang lir.

Kasa mapang nung Asian Games gold-medallist Krishan (69kg)-i 2012 küm Arjuna award nguogo. Arishi küm 28 tain asayar ya 2018 küm CWG nung gold aser Asian Games nung bronze medal anguba sülen professional aküm.

Pa amateur circuit-i taoba küm meyipa aru aser South Asian Games nung asaya, kong pai gold medal angu aser taküm March ita Jordan nung Asian qualifiers asayaba mapang Olympics atema qualify süa

liasü. Arjuna atema toktepertem rongnung Kaushiki, taoba küm ana kanga junga asayaogo aser world championship (2019) nung mezüng shilem agiba mapang lai bronze medal ngua Olympics atema qualify asü aser 2018 Commonwealth Games nunga lai silver medal nguogo.

Kaur aser Borgohain naprongla Asian qualifiers nung Tokyo atema qualify süogo.

Qamar, shiba Arjuna award nguogo, pa ya India nunger rongnung boxing nung Commonwealth Games nung gold-medal angur mezüngbuba asayar lir aser pa küm ka dak tema tetsür coach ama inyaka arudar.

Kasa mapang nung Yadav ya MC Mary Kom den kanga junga sendaktepa lir aser lai taoba küm ana tashi la asaya nung rangloker asayartetba atema pa nem tenüngsang agütsüo.

Maneni N Usha-a Dhyam Chand award atema tenüng agütsüo.

BFI-i naroküm balala atema tenüng agütsürtem:

Rajiv Gandhi Khel Ratna: Amit Panghal, Vikas Krishan.

Arjuna Award: Lovlina Borgohain, Simranjit Kaur and Manish Kaushik.

Dronacharya Award: Mohammed Ali Qamar, Chhote Lal Yadav.

Dhyam Chand Award: N Usha.

# Rijiju & Munda nati Khelo India e-Pathshala Programme tenzüksü

**Aami/June 1, 2020 (Agencies):** Sports Minister Kiren Rijiju aser Tribal Affairs Minister Arjun Munda nati Hombarnü Khelo India e-Pathshala programme tenzüksüo, kong Linük nung tesem balala nungi lanur archer tem, archery coach aser mongintem densema liasü.

E-pathshala sentong ajanga kinük nung aliba asayartem nem online coaching aser education agütsüsi nükjidong lir.

Iba sentong ya Sports Authority of India (SAI), aser National Sporting Federations (NSFs) na senteper amenokba lir.

Kiren Rijiju-i ashiba agi, iba amala sentong ya tang kanga nüngdaker.

"Iba sentong ajanga India nung secluded areas tem nung aliba asayartem den sendakteptsü, shirnok nungtugu asayar aser coach tem den ajuruteptsü asoshi aibenbo maongka mangutsü akok. Iba sentong ajanga lanur asayartem saisapong professionally agütsü asoshi ajungmesotsü ta ni

temulung lema bilemer," ta Rijiju-i ashi.

Munda, shiba Archery Association of India (AAI) tir lir, pai, "iba sentong ajanga tanur archer tem dena sendakteptsü asoshi teyari agütsüsi, shirnok yimtsüng tilatem aser tribal areas tem nung lir. Khelo India e-pathshala ajanga parnok coach tajungtibatem den sendakteptsü," ta ashi.

E-learning programme ajanga asaya 21 ayimjema inyaksü. Asayatem rongnung athletics, archery, boxing, cycling, fencing, football, gymnastics, hockey, judo, kayaking & canoeing, kabaddi, para games, rowing, shooting, taekwondo, table tennis, volleyball, weightlifting, wrestling aser wushu densema lir.

Iba sentong ya senior coaches temi achaayangtsü aser Sports Scientist, High-Performance Directors aser High-Performance Managers committee kati asadanga alitsü. Iba committee yagi mapangshia osang agüja alitsü.

# Thiem, Kyrgios, Elina & Bertens nung Berlin nung asayatsü

**Aami/June 1, 2020 (Agencies):** Dominic Thiem, Nick Kyrgios, Elina Svitolina aser Kiki Bertens nunger Berlin nung July ita grass aser hard-court asayamung nung shilem agütsü renema lir.

Steffi Graf Stadium nung July 13 nungi 15 tashi grass court nung asayatsü aser Berlin indang Tempelhof Airport hangar nung July 17 nungi 19 tashi hard court asayamung ka asayatsü. Asayamung anaprongla ya stadium shibanga yur asayatsü.

Coronavirus wara ajanga World War II sülen taküm mezüngbuba Wimbledon athiba sülen 2020 küm atema iba asayamung ya mezüngbuba grass-court tennis asayamung asütsü. Iba asayamung nung tebur trok aser tetsür trok asayatsü renema lir.

"Ni koma asayatetdir aji jangjatsü asoshi yongyar," ta Germany nunger asayar Alexander Zverev-i ashi, shiba Austria nunger asayar Thiem aser Australia nunger Kyrgios nunger den tokteptsü.

"Ni kanga meranga asayaa arudar, saka mapang talangka lir tang mezüngbuba asayamung ka nung shilem agütsü lir.

"Anogo tenet tsüngda court balala ana nung asayatsüji jangrademtsüka asütsü," ta paisa ashi.

Tetsür asayamung nung Germany tsür Julia Goerges aser Andrea Petkovic nata Ukraine tsür Svitolina aser Netherlands tsür Bertens den asayatsü. Tenaprongla top 10 nung lir.

Asayamung reprangtsüpur tem marudaktsütsü aser asaya mapang tetendangertem melena electric line-calling amshitsü. Asayatem ajak set asemsem asayatsü.

Asayatem ajak broadcast asaütsü aser senpet sen tebur atema 200,000 euros (\$222,000) aser tetsürtem atema 100,000 asütsü.

Alima ajunga wara agi sünga akümba ajanga ATP aser WTA tours ajak thinena lir.

Steffi Graf Stadium nung June ita 13 nungi 20 nü tashi mezüngbuba WTA grass season asayamung asayatsü liasü, ajisüka tashidak poktetba ajanga athitsüsa aküm

Tempelhof Airport ya 2008 küm shibangogo, saka ground tem public park ama lapoka lir kong 1948-49 küm Berlin Airlift sülen tayimtsütem anena liasü.

# Icardi PSG nungi küm pezü asayatsü nangzüktep



**Aami/June 1, 2020 (Agencies):** Paris Saint-Germain-i Argentina nunger international asayar Mauro Icardi, küm pezü atema Inter Milan nungi alizükogo, ta club anayagi Deobarnü sangdonga liasü. Milan nungi PSG-i loan nung aoba mapang pa alizüktsü asoshi lenmang mesapoka ayuba maongka agia parnoki Icardi alizükogo.

Icardi iba season nung PSG nung oa aden aser coronavirus tashidak poktetba ajanga Ligue 1 asayamung anena mata tsüngda pai asaya 31 nungi goal 20 idaktsür liasü. Iba asayamung ya tembanga masayatet aser par club nem

takok agütsüo. "2019-2020 season nung Inter Milan nungi loan nung anir aruba sülen Mauro Icardi den tenangzüktepba ka yangluba Paris Saint-Germain-i pelashishia sangdonger," ta club sangdong ka ajanga metetdaktüsü.

Icardi, shiba Argentina nungi ti ben asayaogo, saka Italian passport bena lir, pa 2024 küm June ita 30 nü tashi atema tenangzüktepba ka yangluogo.

Tang rongsenketsüng nung timtem adoker aliba apir PSG-i mezüng euro million 70 agütsüsi mepeshiba ama mesüi euro million 60 tekübok agütsüsi telemtetba agiogo, ta

French aser Italian sports press sangdong ajanga metetdaktüsü.

Covid-19 wara pokteter mepetmesü adokba sülen tang mezüngbuba asayar togtibang ka transfer süogo.

Arishi küm 27 tain Icardi aniocka ajanga Uruguay nunger striker Edinson Cavani, 33 anintsü temaitsü sayur asütsü akok. Cavani indang contract June 30 nü tembangtsü.

Icardi indang mezüngbuba season ano metembang asütsü akok, kechiyong Champions League ano tembanga masayai lir aser August ita asayatsü imlar. Season trok tashi Inter nungi jangaradema asayaogo aser iba atema Inter Milan-i Icardi nem tenüngsang agütsüo aser pa tarutsü nung takok nung aotsü imlaja ataba lemsatepogo.

2015 aser 2018 küm Serie A nung goal timba agüjaka Italy nung asayaba mapang pai takok marok ka danga mongutet. 2019 küm February ita Inter Milan nung mangatetep ka adokba sülen pa ket nungi captain mapagina liasü.

Iba season Antonio Conte-i coach mapa belenzükba sülen pa nem maongka kecha magütsü.

**BILEMDANGANG**  
**"Takok ajak temeranger meyong lir."**